

Jerwin Giel:

“Bo ta bira un role model no solamente pa hubentud pero pe comunidad completo”



Un hoben cu sigur tin su impacto riba hubentud y e comunidad di Aruba completo cu su storia unico di sobrevivencia di e malesa cancer ta e hoben Jerwin Giel kende aña pasa a wordo reconoci den e proyecto Hoben y Talentoso. Como un di e hobenan reconoci na 2014 pa e proyecto Hoben y Talentoso, Jerwin ta conta nos cu esaki tabata un honor pe. Mirando cu na Aruba tin hopi hoben cu talento y pa ser scogi

como un di esunnan cu ta sobresali pa bini den un buki ta algo sumamente grandi.

Bo ta bira un rolemodel no solamente pa e hubentud pero pa e comunidad completo. E aña 2014 tambe a bay cu su retonan pa e hoben Jerwin Giel; “Mi mester bisa cu e aña aki mi a duna varios speech di motivacion na diferente scol na Aruba y e feedback cu bo ta haya di esaki ta e miho regalo pa mi. Cu otro palabra un aña sigur

exitoso.

Den e edicion di Hoben y Talentoso 2014 e hoben Jerwin Giel a wordo reconoci den e “Award Book” como un hoben talentoso den deporte pero alabes tambe un sobreviviente di e malesa cancer.

“Mi a pasa den momentonan dificil den mi bida, tur hende por pasa den esaki, pero tur hende por haci manera ami a haci, esta controla bo mente, haciendo esaki bo por tin e resultado desea. Esaki ta e

parti mas fuerte di mi personalidad. Tur hende por..ta abo mester kier,” Giel a bisa.

Por ultimo Jerwin a duna su mensahe na tur hoben cu un dia lo kier wordo reconoci den e proyecto Hoben y Talentoso. Segun Jerwin si bo tin un meta of idea cu bo lo kier logra bo tin cu haci esaki, si bo no haci e bo no por logra esey. Haci e prome stap, nunca tene miedo di faya paso esey por pasa cu nos tur, si bo ta suficientemente fuerte bo lo lanta bek y miho

so bo por bira. E hoben Jerwin Giel tambe lo forma parti di e evento unico aki otro siman diaranson.

E proyecto Hoben y Talentoso 2015 lo culmina diaranson 4 di november den Cas di Cultura unda lo haci entrega di e “Award Book Hoben y Talentoso 2015” na e 28 role model nan nomina. Pa tur e interesadonan cu kier sa un poco mas riba e proyecto Hoben y Talentoso por subi e facebook-page na e link [facebook.com/hobentalentoso](https://www.facebook.com/hobentalentoso). □